

Tuaiwa. E tukua noatia ana nga pakeha ki te hoko i te wahi kotahi o ia tangata o ia tangata e mohio i te whakaritenga a tetahi engari, me hui hui tonu nga tangata i te karaati ki te kore ratou e noho tahi, me kati rawa te hoko i te whenua.

4. Ko etahi enei o nga tini he, o nga raruraru nunui i ekengia te tangata maori e te ture mo o matou whenua tenei ake ka kitea era atu tini he, kei te mea ka whakaaetia e te Paremata kia tahuri ki taua mahi.

5. I roto i nga nohoanga e toru kua pahure atu nei ko te korero tonu tenei a te kawanatanga a tenei ratou ka anga ka mahi i tetahi ture hou, ture marama, hei ritenga mo nga whenua o nga tangata maori a tatuana te ngakau o te tangata maori ki enei ki taurangi a tatari marire ana matou kia pumau ai aua kupu a te Kawanatanga, a moroki noa nei ka pore ano matou kia kite noa i te hua o aua korero a te Kawanatanga engari i rongo kau matou i nga ki taurangi.

6. I roto i nga tau kua pahure atu nei ka tonoa mai etahi pakeha e te Kawanatanga ki ia whenua ki ia whenua hei patai haere kia matou a korero mai ana aua pakeha kia matou i te ture hou a te Kawanatanga a whakaatu ana matou i nga mate me nga raruraru katoa e tau nei ki runga ki a matou, na te mahi he a to kouton Kooti whakawa whenua na te mahi he hoki a nga roia a nga Kaiwhakamaori.

7. Mehemea i ata rite marire nga whakaaro a te Kawanatanga mo nga tangata maori penei kua awhina matou e te Kawanatanga a penei kua oti ke tetahi ture whakahaere i te tika i te marama.

8. Awangawanga ana matou kei whakapuakina ano nga kupu taurangi a te Kawanatanga e tenei nohoanga a te Paremata a ka whakahua ana nga korero ahuareka mo to ratou ture hou. Ko te ture ia e kore matou e kite i te otinga.

9. E pouri ana matou i tenei mahi tinihanga a te Kawanatanga koia matou ka tono atu nei ki te Paremata kia aro mai kia matou to ratou whakaaro a ma ratou e akiaki i te Kawanatanga ki te whakaturu i o ratou kupu.

10. Ko nga tangata maori anake i uru i roto i te Pakeha i te whainganga, i noho marire i runga i te tikanga o te ture i hangaa e te Paremata, ko ena nga tangata i mate i mea hoki ratou he ture pai te ture mo te whenua, ruritia ana o matou whenua a karaatitia, notemea i kiia hoki na reira ka tino pumau ai te whenua mo matou i te mana o te Kuini a ko tenei ka tata te pareho o matou whenua i te mokete i te hoko a noho pohara ana matou noho whenua kore ana.

11. Mehemea kahore matou i whakapono ki te ture a te Pakeha me i rite matou ki nga iwi tutu, pena me te iwi o te Kingi e pupuri ana i te whenua i runga i te tikanga maori penei ka toitu rawa ano kia matou o matou whenua, a e kore e pau i te nama, i te waipiro, i nga nama iti noa iho ranei. Ki nga pakeha tinahanga.

12. A ko tenei engari ano me mutu te mahi a te Kooti Whakawa Whenua i te mea e kore e hangaa tetahi ture pai atu i tenei kua oti nei Koia matou i tono ai ki te Paremata kia whakakahoretia nga ture kikino e mau tonu nei a kia hangaa mai he ture hou e taea nei te mohio e matou a kei ngaro rawa o matou whenua i te nama, i te waipiro, kei moketetia te whenua i runga i te korero a te tangata takitahi te korero nui ai kia nga tangata katoa o te karaati kei whakarerea matou kia mau i te ringa a te roia a te kaiwhakamaori o nga pakeha hoko whenua penei ka taea era atu kino te pehi.